

# Ishara Zinazoelekeza Njia



## SABATO MCHANA

**Somo la Juma Hili:** Yohana 2:1-11; Yohana 4:46-54; Yohana 5:1-16; Marko 3:22, 23; Mathayo 12:9-14; Yohana 5:16 - 47.

**Fungu la Kukariri:** "Basi kuna ishara nyingine nyingi alizozifanya Yesu mbele ya wanafunzi wake, zisizoandikwa katika kitabu hiki. Lakini hizi zimeandikwa ili mpate kuamini ya kwamba Yesu ndiye Kristo, Mwana wa Mungu; na kwa kuamini mwe na uzima kwa jina lake" (Yohana 20:30, 31).

**K**wanini Yohana aliandika Injili yake? Je, alitamani kusisitiza juu ya miujiza ya Yesu? Au kusisitizia baadhi ya mafundisho mahsusi ya Yesu? Sababu ya kuandika hivyo ilikuwa ni nini?

Kwa nguvu na mguso wa Roho Mtakatifu, Yohana anaelezea sababu. Anasema kwamba ingawa mambo mengine mengi yangeandikwa juu ya maisha ya Kristo (Yohana 21:25), visa alivyovihusisha viliandikwa ili "mpate kuamini ya kwamba Yesu ndiye Kristo, Mwana wa Mungu; na kwa kuamini mwe na uzima kwa jina lake" (Yohana 20:31).

Juma hili tutatazama katika simulizi ya Yohana baadhi ya miujiza ya Bwana Yesu ya awali - kutokea alipobadilisha maji kuwa divai harusini, hadi alipomrejeshea afya mtoto wa mtu fulani aliyekuwa mgonjwa sana, hadi katika uponyaji wa mtu kwenye kisima cha Bethzatha.

Yohana anaiita miujiza hii "ishara." Hamaanishi kitu kama ishara au alama za barabarani, bali tukio la kimuujiza linaloelekeza kwenye uhalisia wa kina: Yesu kama yule Masihi. Katika taarifa zote hizi, tunaona mifano ya watu walioitika kwa imani, na mifano yao inatuvuta kutenda vivyo hivyo.

Jifunze somo hili kwa maandalizi ya Sabato ya Oktoba 5.

## Harusi Pale Kana

**Soma** Yohana 2:1-11. Ni ishara gani aliyoifanya Yesu pale Kana na Je, iliwasaidiaje wanafunzi Wake katika kufikia hatua ya kumwamini?

Kumwona Yesu akitenda muujiza wa kubadilisha maji kuwa divai kulionesha ushahidi uliokubaliana na uamuzi wa wanafunzi wa kumfuata Yesu. Ni kwa namna gani isingekuwa ishara kubwa iliyoelekeza Kwake kama aliyetoka kwa Mungu? (Pengine walikuwa hawajawa tayari kuelewa kwamba Alikuwa Mungu.)

Musa alikuwa kiongozi wa Waisraeli, na aliwatoa Israeli nchini Misri kwa wingi wa "ishara na maajabu" (Kum. 6:22; Kum. 26:8). Yeye Ndiye ambaye Mungu alimtumia kuwaweka huru Israeli kutoka kwa Wamisri. (Kwa namna fulani, alikuwa "mwokozi" wao.)

Mungu alitabiri kupitia kwa Musa kwamba nabii angeinuka ambaye alikuwa awe kama Musa. Mungu aliwaomba Israeli wamsikie Yeye (Kum. 18:15; Mt. 17:5; Mdo 7:37). Huyu "nabii" alikuwa ni Yesu, na katika Yohana 2, Yesu alifanya muujiza Wake wa kwanza, ambao huo wenyewe ulielekeza kwenye ukombozi wa wana wa Israeli kutoka Misri.

Mto Naili ulikuwa ndiyo raslimali kuu na mungu kwa Wamisri. Moja ya mapigokumi lilielekezwa kwenye mto – kubadilishwa kwa maji yake kuwa damu. Pale Kana, Yesu alitenda muujiza wa namna hiyo hiyo, lakini, badala ya kugeuza maji kuwa damu, Yeye aliyageuza kuwa divai.

Maji yalitoka kwenye mitungi sita ya maji ambayo yalitumika kwa makusudi ya utakaso kwenye sherehe za Kiyahudi, hilo likihusianisha muujiza kwa karibu zaidi na mada za kibiblia za wokovu. Kwa kuelezea tukio la kugeuza maji kuwa divai, na hivyo kurejea katika uzoefu wa Kutoka, Yohana alikuwa akielekeza kwa Yesu kama Mkombozi.

Je, mkuu wa karamu alifikiria nini juu ya divai isiyochachuka ambayo Yesu aliitoa? Kwa kweli alishangazwa na ubora wa kinywaji na, bila kujua muujiza ambao Yesu alikuwa ameutenda pale, alidhani kwamba walikuwa wametunza iliyokuwa bora Neno la Kiyunani oinos linatumika kwa sharubati (juisi) mpya na pia iliyochachuka (taz. The Seventh -day Adventist Bible Dictionary, uk. 1177). Ellen. G White anasema kwamba sharubati iliyotengenezwa katika muujiza huo haikuwa na kilevi (taz "At the Marriage Feast," The Desire of Ages, uk. 149). Hakuna shaka, wale waliojua kilichotokea, walishangazwa na tukio hilo.

**Je, una sababu gani za kukufanya umfuate Yesu? (tumepewa nyingi, sivyo?)**



## Ishara ya Pili Galilaya

Wakati wote katika huduma Yake duniani, Yesu alitenda miujiza iliyosaidia watu kumwamini Yeye. Yohana aliirekodi miujiza hii ili wengine pia wapate kumwamini Yesu.

**Soma Yohana 4:46 - 54.** Kwa nini huyu mwinjilisti anaonesha uhusiano na muujiza pale kwenye karamu ya harusi?

Katika kutoa taarifa ya ishara ya pili aliyoifanya Yesu pale Galilaya, Yohana anarejea kwenye ishara ile ya kwanza, kwenye harusi ya Kana. Yohana anaonekana kusema, Ishara alizozifanya Yesu zitakusaidia kumwona Yesu kuwa ni nani. Kisha, Yohana anaongezea, "Hiyo ni ishara ya pili aliyoifanya Yesu, alipokuwa ametoka Uyahudi kufika Galilaya." (Yohana 4:54).

Mwanzoni, jibu la Yesu kwa ombi la yule diwani linaweza kuonekana kuwa la ukali. Hata hivyo, ofisa huyu alikuwa amefanya uponyaji wa mtoto wake kuwa kigezo cha kumwamini Yesu. Yesu aliusoma moyo wake na kuonesha ugonjwa wa kiroho uliokuwa mzito kuliko ugonjwa wa mtoto wake uliokuwa ukitishia uhai. Mara ile mtu yule kama aliyepigwa na radi kutoka mbinguni akatambua kwamba umaskini wake wa kiroho ungegharimu uhai wa mwanawe.

Ni muhimu kutambua kwamba miujiza, kwa yenyewe, haikuthibitisha kwamba Yesu alikuwa Masihi. Wengine wamewahi kutenda miujiza. Wapo waliokuwa anabii wa kweli, wengine wa uongo. Miujiza inadhihirisha tu uwepo wa nguvu isiyo ya kibinadamu; kwa yenyewe, haimaanishi kwamba ni lazima Mungu Ndiye anayeitenda. (Shetani anaweza kutenda "miujiza," kama kwa neno "miujiza" tunamaanisha matendo yasiyo ya kawaida kibinadamu.)

Diwani yule kwa uchungu alijiangukia katika rehema ya Yesu, akimsihi Bwana amponye mwanawe. Mwitiko wa Yesu ulikuwa wenye kutuliza. Alisema, "Enenda; mwanao yu hai" (Yohana 4:50). Kwa kweli, kauli "yu hai," ipo katika wakati uliopo katika Kiyunani. Matumizi ya maneno haya yanaitwa "wakati ujao uliopo," ambapo tukio la wakati ujao linanenwa kwa uhakika kana kwamba linatokea tayari. Huyu mtu hakuharakisha kwenda nyumbani lakini, kwa kumwamini Yesu, alifika nyumbani kesho yake - na kukuta kwamba, wakati ule ule Bwana Yesu aliposema maneno yale, homa ilimwacha mwanawe.

Hii ni sababu yenye nguvu kiasi gani ya kumwamini Yesu!

**Hata kama inapasa tuone muujiza, ni kigezo gani kingine ambacho inatupasa tukiangalie kabla ya kudai kwamba muujiza huo unatoka kwa Mungu?**

## Muujiza Kwenye Kisima cha Bethzatha

Ishara iliyofuata ambayo Yohana anairekodi ilifanyika kwenye Birika (Kisima) la Bethzatha (Yohana 5:1-9). Iliaminika kwamba malaika alisababisha msogeo ndani ya maji na kwamba mgonjwa wa kwanza kuingia kwenye maji angeponywa. Kutokana na hali hiyo, vibaraza kando ya birika hilo vilijaa watu waliokuwa na matumaini ya kuponywa katika tukio lingine. Yesu alikwenda Yerusalemu na, alipokuwa akipita karibu na birika, aliona umati wa watu waliokuwa wakingoja.

Ilikuwa taswira ya pekee kiasi gani pia! Watu wote hawa, baadhi yao wakiwa wagonjwa hasa, wakingoja na kusubiri kwa ajili ya kuponywa kwenye maji ambako hakutatokea. Hii ilikuwa fursa ya pekee kiasi gani kwa ajili ya Yesu!

**Soma** Yohana 5:1-9. Kwa sababu ni dhahiri kwamba yeyote aliyekuwa karibu na birika alitaka kupona, kwa nini Yesu alimwuliza aliyepooza kama alitaka kuponywa? (Yohana 5:6)

Mtu anapokuwa ameugua kwa muda mrefu, ugonjwa unakuwa ni kawaida ya maisha yake na ijapo inaweza kuonekana kuwa jambo geni, wakati fulani inaweza kuonekana kuwa ni jambo linalosumbua kuuachilia ulemavu. Yule mtu anaonekana kulingana na jibu lake kuonesha kwamba anataka uponyaji. Tatizo ni kwamba anautafutia mahali pasipo sahihi – wakati yule aliyeumba miguu yake akiwa amesimama pale pale mbele yake. Huyu mtu hakujua aliyekuwa akinena naye; ingawa baada ya kuponywa, inawezekana alianza kuelewa kuwa Yesu alikuwa nani, kwa kweli, mtu fulani ni wa pekee sana.

“Yesu hamwombi mgonjwa huyu awe na imani Kwake. Yeye Anasema tu, ‘Simama, ujitwike godoro lako, uende.’ Lakini imani ya mtu huyo inalishika neno hilo. Kila neva na misuli inafurahishwa na maisha mapya, na hatua ya afya inavijia viungo vyake vilivyolemaa. Bila shaka anaweka nia yake ya kutii amri ya Kristo, na misuli yake yote inaitikia mapenzi yake. Akisimama kwa miguu yake, anajiona kuwa mtu mwenye uhai; awezaye kutenda mambo. . . . Yesu hakuwa amempa uhakikisho wa msaada wa kimungu. Huenda mtu huyo aliacha kuwa na shaka, na hivyo akapoteza nafasi yake moja ya uponyaji. Lakini aliamini neno la Kristo, na kwa kulitenda akapata nguvu.” – Ellen G. White, *The Desire of Ages* (Tumaini la Vizazi Vyote), uk. 202, 203.

Baadaye Yesu alikutana na mtu huyu kwenye hekalu na kusema, “Angalia, umekuwa mzima; usitende dhambi tena, lisije likakupata jambo lililo baya zaidi” (Yohana 5:14). Kuna uhusiano gani kati ya ugonjwa na dhambi? Kwa nini ni lazima tuelewe kwamba siyo maradhi yote yaliyo matokeo ya moja kwa moja ya dhambi fulani mahususi maishani mwetu?



## Mioyo Migumu

Ishara, maajabu na miujiza kama ilivyo kwa yenyewe, haithibitishi kwamba jambo hilo linatokana na Mungu. Lakini, kwa upande mwingine, likitokana na Mungu, ni jambo la hatari kulikataa.

**Soma** *Yohana 5:10-16*. Ni mafundisho gani tunayoweza kuyapata kutokana na ugumu wa kushangaza wa mioyo ya viongozi wa kidini kulingana na Bwana Yesu na muujiza aliokuwa tu ameutenda?

---

Yesu alipojidhihirisha kwa yule mtu aliyekuwa ameponywa, mara ile yule mtu aliwaambia viongozi wa kidini kwamba huyu alikuwa ni Yesu. Ungeweza kudhani huu ungekuwa muda mwafaka wa kumsifu Mungu, lakini badala yake, viongozi “wakamwudhi (wakamtesa) Yesu (wakitaka kumuua), kwa kuwa alitenda hayo siku ya Sabato” (*Yohana 5:16 tafsiri ya NKJV*).

Uponyaji ulikuwa unaruhusiwa katika Sabato pale tu ilipokuwa ni dharura. Mtu huyu alikuwa amelemaa kwa miaka 38; kwa hiyo, uponyaji wake haukuwa dharura. Halafu pia, umuhimu wa yeye kulibeba godoro lake ulikuwa ni nini hasa? Mtu angefikiri kwamba mtu aliye na uwezo kutoka kwa Mungu kufanya muujiza kama huo angejua pia ikiwa inaruhusiwa kubeba mkeka au godoro nyumbani siku ya Sabato. Ni wazi, Yesu alitaka kuwapeleka kwenye kweli za ndani zaidi za Biblia zaidi ya masharti na kanuni zilizotungwa na wanadamu ambazo, katika matukio fulani, zilizuia imani ya kweli.

**Masimulizi** haya mengine yanafundisha nini kuhusu jinsi watu wanavyoweza kuwa wagumu kiroho, licha ya uthibitisho? (*Yohana 9:1-16; Marko 3:22, 23; Mathayo 12:9-14*)

---

Je, viongozi hao wa kidini waliwezaje kuwa vipofu kiasi hicho? Jibu linaloelekea ni kwamba ilikuwa ni kwa sababu ya mioyo yao wenyewe iliyopotoshwa, imani yao isiyo ya kweli kwamba Masihi angewakomboa kutoka Rumi sasa, na kupenda kwao mamlaka na kukosa kujisalimisha kwa Mungu. Haya yote yaliwasaidia kukataa ile kweli iliyokuwa imesimama mbele yao.

**Soma** *Yohana 5:38-42*. Bwana Yesu alikuwa akionya nini? Tunaweza kujifunza nini kutokana na maneno haya? Yaani, ni kitu gani Kinachoweza kuwa ndani yetu kinachotupofusha tusiione ile kweli tunayoihitaji kuijua na kuitumia katika maisha yetu wenyewe?

## Madai ya Yesu

Muujiza pale kwenye Birika la Bethzatha ulikuwa fursa bora sana kwa Yohana kumwelezea Yesu kuwa ni nani. Yohana anatumia aya tisa kuelezea muujiza huu na baada ya hapo takriban aya 40 zinatumiwa (tazama hapo chini) kumwelezea Yeye aliyeutenda muujiza huo.

**Soma** *Yohana 5:16-18. Kwanini Yesu aliudhiwa kwa sababu ya tendo Lake la siku ya Sabato?*

*Yohana 5:18* inaweza kusumbua kwa sababu inaonekana kusema kwamba Yesu alikuwa akiivunja Sabato. Hata hivyo, mtazamo wa karibu katika *Yohana 5:16-18* unaonesha kwamba Yesu anasisitiza kwamba “kazi” Yake siku ya Sabato inapatana na uhusiano Wake na Baba Yake. Mungu haachi kutegemeza ulimwengu siku ya Sabato. Kwa hiyo, shughuli ya Sabato ya Yesu ilikuwa sehemu ya madai Yake ya Uungu. Viongozi wa kidini walimuudhi kwa msingi wa madai ya kuvunja Sabato na dai la kuwa sawa na Mungu.

**Soma** *Yohana 5:19-47. Yesu alikuwa akisema nini ili kuwasaidia viongozi wamwone Yeye kwa namna alivyo hasa, dai lililothibitishwa kwa nguvu sana na muujiza aliokuwa tu ameufanya?*

Bwana Yesu anatetea matendo Yake kwa hatua tatu. Kwanza, Anaelezea uhusiano Wake wa karibu na Baba (*Yohana 5:19-30*). Bwana Yesu anaonesha kwamba Yeye na Baba Yake wanatenda kwa upatanifu, hadi kufikia kiwango cha Bwana Yesu kuwa na uwezo wa kuhukumu na kufufua wafu (*Yohana 5:25-30*).

Pili, Bwana Yesu anatumka “mashahidi” wanne kwa mfululizo wa utetezi Wake – *Yohana Mbatizaji (Yohana 5:31-35)*, muujiza ambayo Yeye Mwenyewe anafanya (*Yohana 5:36*), Baba (*Yohana 5:37, 38*), na Maandiko (*Yohana 5:39*). Kila mmoja wa “mashahidi” hao anatoa ushuhuda unaokubaliana na Bwana Yesu.

Hatimaye, kwenye *Yohana 5:40-47*, Yesu anaweka mbele ya washtaki Wake hukumu yao wenyewe, akionesha tofauti kati ya huduma Yake na kujipenda kwao nafsi. Hukumu yao, Anasema, itatoka kwa Musa (*Yohana 5:45-47*), Yeye ambaye wameweka matumaini yao kwake.

Je, tunawezaje kuwa waangalifu tusianguke katika mtego wa kumwamini Mungu, hata kuwa na mafundisho sahihi, lakini tusijisalimishe kikamilifu kwa Kristo? Leta jibu lako darasani siku ya Sabato.



**Jifunze Zaidi:** “Yesu hakuwa amempa (mtu huyo mlemavu) uhakikisho wowote wa msaada wa Mungu. Huenda mtu huyo aliacha kuwa na shaka, na kupoteza nafasi yake moja ya uponyaji. Lakini aliamini neno la Kristo, na kwa kulitenda alipokea nguvu.

“Kupitia imani hiyo hiyo tunaweza kupokea uponyaji wa kiroho. Kwa dhambi tumetengwa na uzima wa Mungu. Nafsi zetu zimepooza. Sisi wenyewe hatuna uwezo wa kuishi maisha matakatifu kama vile yule mtu asiyejiweza alivyokuwa bila uwezo wa kutembea. . . Acha hawa waliokata tamaa, wanaohangaika watazame juu. Mwokozi anainama kwa ajili ya hawa aliowanunua kwa damu Yake, akisema kwa upole na huruma isiyoweza kuelezeka, ‘Je! Wataka kuwa mzima?’ Anakutaka uinuke katika afya na amani. Usisubiri hadi ujisikie kwamba umeponywa. Amini neno Lake, nalo litatimizwa. Weka nia yako upande wa Kristo. Weka nia katika kumtumikia Yeye, na katika kutenda kulingana na neno Lake utapokea nguvu. Mazoea yoyote maovu, shauku kuu ambayo kwa kuiendekeza kwa muda mrefu hufunga roho na mwili, Kristo anaweza na anatamani kukuondoa kutoka katika hali hiyo. Ataipa nafsi uhai, nafsi ambayo imekufa ‘kwa sababu ya makosa.’ Efe. 2:1. Atawaweka huru mateka ambao wameshikiliwa na udhaifu na bahati mbaya na minyororo ya dhambi.” — Ellen G. White, *The Desire of Ages*, uk. 203.

“Yesu alikanusha shitaka la kukufuru. Akasema, “Mamlaka yangu, kwa kufanya kazi ambayo mnanishitaki kwayo, ni kwamba Mimi ni Mwana wa Mungu, ambaye niko mmoja pamoja Naye katika asili, katika nia, na makusudi.” — *Tumaini la Vizazi Vyote*, uk. 111.

## Maswali ya Majadiliano:

1. Hebu tafakari somo la juma hili. Imani ilikuwa ndio ufunguo uliofanya uponyaji huu ukawezekana. Viongozi, kinyume chake, walidhihirisha hatari za mashaka na kutokuamini. Ni kwa nini inatupasa tusichanganyikiwe kati ya kuwa na maswali (ambayo sote huwa tunayo) na kuwa na mashaka? Kwa nini haya yote sio kitu kile kile, na kwa nini ni muhimu kujua tofauti kati yake?

2. Tazama swali la mwisho la Alhamisi. Kwa nini, kama Waadventista wa Sabato, lazima tuwe waangalifu hasa kuhusu hatari hii? Ingawa ni muhimu, kwa mfano, kujua na hata kushika siku sahihi ya Sabato au kujua kuhusu hali ya wafu — kwa nini kweli hizi hazituokoi? Nini kinachotuokoa, na jinsi gani?

3. Iangalie kwa makini Yohana 5:47. Je, wale ambao leo, kwa mfano, wanakataa kwamba Gharika ilikuwa ya ulimwengu mzima, au Uumbaji ulikuwa halisi wa siku sita, wanafanyaje na kile hasa ambacho Yesu alionya dhidi yake hapa?